



TATA IBADAH OLOB-OLOB GKPS RESORT POLONIA di GKPS Padang Bulan, Minggu 27 September 2020

I. Persiapan Ibadah (martonggo haganupan siparugas).

II. KEBAKTIAN

1. VOTUM-INTROITUS-TONGGO

P. Riap ma hita jongjong!

Ibagas Goranni Naibata Bapa pakon Tuhan Jesus Kristus ampa Tonduy Napansing Sitompa langit pakon tanoh on.

K. Amen

P. Ham Jahowa ise do na boi tondok bani lampo-lampo-Mu? Ise do na malo marianan bani dolog-Mu na pansing in?

K. Ai ma halak na so panurakon bani parlahouni, sidalankon hapintoron, halak siluarhon na pintor ibagas uhorni. Na so manrisai marhitei dilahni, na so manghorjahon na jahat dampak hasomanni, anjaha na so parohkon habadoron bani sinkutani

P. na mangkagigihon halak na pinabali, tapi na pasangapkon halak na mangkabiari Jahowa, na so mosei ia humbani bijani age rugi ia marhitei ai.

P+K. **mandodingkon Haleluya No. 467:3 "Ise Do Boi". Es=do**

Marhabiaran tongtong hu Bamu, mangkasiholhon hasintongan-Mu Na mangkargahon pamilihon-Mu. In do na boi das hu bai dolog-Mu.

P. Halak na manghorjahon na sonai ai, seng anjai targompang sadokah ni dokahni. Haleluya, haleluya, haleluya

P+K. **Mandodingkon:** Haleluya, haleluya, haleluya.

P. **Martonggo ma hita!**

Tarimakasih ma isombahkon hanami hu-Bamu Tuhan, namarmuduhon goluh nami ampa napatalupkon hanami boi tondok bai lampo-Mu i tongah-tongah pandemi covid 19. Ibere Ham do bannami hata hagoluhon, ma manogu-nogu hanami ase totap marhabiaran hu-Bamu ronsi sadokah ni dokahni. Sadarion hanami, kuria-Mu GKPS sa resort Polonia mangkamalashon 117 tahun pardasni Ambilan Namadear i tanoh Simalungun, in ma namanondangi anjaha paliharhon halak Simalungun lambin manandai dalan hasintongan in. Ajari Ham ma hanami, ase parsombahon nami on sadalan bani harosuh niuhur-Mu. Jalo Ham ma tonggo nami on, ibagas Kristus Jesus Tuhan nami. Amen.

(*hundul ma kuria*)

2. Mandoding Haleluya No. 407:1-2 "Puji ma Jahowa" Es=do

Puji ma Jahowa Tuhan Naibata, ai marjumbalang do goranNi in Haganupan jolma sai marsombah ma, sai hagoluhkon Hata-Ni in Holsoh haganupan mambur, tubuh ma malas ni uhur

Gok bai pangarapan, holong na totap, rap mangolobkon goran-Ni in.

Ningon do marsombah bani Naibata, puji ma Ia pargogoh do in

Ulang marnaloja sai irikkon ma, rap mambalosi hata-Ni in

Holsoh haganupan mambur, tubuh ma malas ni uhur

Gok bai pangarapan holong na totap, rap mandodingkon; haleluya!

3. Tonggo Hasasapan Dousa

P. Riap ma hitajongjong!

Martonggo ma hita sopothon hita ma dousanta hubani Tuhan Naibata.

Ham Tuhan Naibata Bapanami, Pardear layak anjaha Parholong ni uhur hubani haganupan jolma. Domma ihatahon Ham, ase totap hanami marhasadaon, manggoluh ibagas damei ampa marsihaholongan. Hape gati do hanami margoluh ampa marpambahenan na so iharosuhkon Ham. Gati pambahenannami, parsahapnami mambobai hasoman hubani na hurang dear. Maidop ma uhur-Mu bannami Ham Naibata, romban hubani dear ni layak-Mu, sasap Ham ma panlanggaronnami, romban hubani dear ni idop ni uhur-Mu. Burihi Ham ma hanami pansing tumang humbani hajahatonnami, anjaha paborsih Ham ma hanami humbani dousanami. Ai mangahap do hanami bani panlanggaronnami, anjaha tongtong do sonson i lobeinami dousanami. Tompa Ham ma uhur na borsih ibagas dirinami, Ham Naibata, anjaha bere Ham ma bannami tonduy na baru anjaha na totap. Amen.

Tangar hita ma hatani Naibata bagah-bagah pasal hasasapan nidousa.

Ai mosor pe sagala dolog anjaha dugur sagala buntu-buntu, tapi idopni uhur-Hu seng anjai mosor humbam, anjaha padan pardameian nahumbangku senganjai morod, nini Jahowa, namaridop ni uhur bam. Hasangapon ma bani Naibata i babou.

P+K. **A m e n**

(*hundulkuria*)

4. Mandoding Haleluya No. 448:1-2 "Mantin ni in do hape" As=do

Mantin ni in do hape Padan ni Tuhan Yesus, Pamalas uhur tene bai ganup na tinobus

Dear tumang padan Nin na gabe sijoloman, patoguh uhur do in bai namar pangarapan

Sai hagoluhkon main baen rudang hajengeson, ase sonang ham ijin gok Tonduy hasintongan

HinalayakNi do in pasirsir haluahon, janah damei uhur min jumpahan hagoluhon

Sai jalo ham Tuhan in na gabe Siparmahan, baen hatengeran do in ronsi na ondos padan

Seng habiaran be in pori aha namasa, ai seng ijin ujung ni goluh ni naporsaya

Sai hagoluhkon ma in baen rudang hajengeson, ase sonang ham ijin gok Tonduy hasintongan

HinalayakNi do in pasirisir hagoluhon, janah damei uhurmin jumpahan hasintongan

5. Manaksihon Haporsayaon

P. Riap ma hitajongjong.

Saksihon hita ma haporsayaonta in, songon nasinaksihon ni ganup halak naporsaya bani sab tanoh on

P+J. Ahu porsaya bani Naibata Bapa, pargogoh na so tarimbang, na manompa langit pakon tanoh on.

Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, pargogoh na so tarimbang in. Hunjai ma Ia mulak magira, laho manguhumi halak na manggoluh pakon na dob matei.

Ahu porsaya bani Tonduy Na Pansing, bani kuria parsadaan na mapansing in, parsaoan ni sagala na mapansing in, bani hasasapan ni dousa, bani parpuhooon ni angkula, pakon bani hagoluhon na sadokah ni dokahni, Amen. (*hundul kuria*)

6. Persembahan pujian: V.G. Sekolah Minggu GKPS Resort Polonia "Tinggikan Dirimu (Kubersyukur Pada-Mu Tuhan)"



7. Mandoding Haleluya No. 499:1-3 "Panorang Olob-Olob" As=do

Panorang olob-olob, sai roh ma hita ganupan

Riap ma mangolobkon ambilan na ondos banta

Domma lihar nuan ganup i kehen in, ge i huluan

In ma kuasa ni hata-Ni Tuhan in, mandilo hita.

Hata ni Naibatanta do mambaen mangasup hita

Bani sagala horja, na dear bani Tuhanta

Domma lihar nuan ganup i kehen in, ge i huluan

In ma kuasa ni hata-Ni Tuhan in, mandilo hita.

Paulak hosah loja, jalo ma hata ni Tuhan
Pasiang paruhuran, sai totap marpangarapan
Domma lihar nuan ganup i kehen in, ge i huluan
In ma kuasa ni hata-Ni Tuhan in, mandilo hita.

8. Acara Khusus

- Mambasa surat tongosan : St. Ir. Berman Sipayung
- Kanonolob-olob : St. Jekonia Saragih, SE. (dirigent)
- Refleksi olob-olob : Sy. Irving Sigumonrong/ST.Wendy. P Saragih, SE.
- Persembahan Pujian : VG Wanita GKPS Hang Tuah“ Halleluya, Puji ma Tuhan”
- Tonggo pangapition : St. Saur Matua Sitanggang MPd

9. Mandoding Halleluya No. 446:1-2 “Sisada Angkula” D=do

Sisada angkula do hita ganupan, ragam ni pagori do hita tongon
Na sombuh bayak, dos do in bani Tuhan, seng dong ilioi, isarihon do tong
Tuhanta do na gabe hayu anggur, ranting-Ni do hita on hajojo
Jolom ma Jesus ulang ham pandur, ase tabun marbuah na ramos.
Tanda ni sisada angkula do hita, rap marpangarapan bani goluh on
Nai do bani horja rap marsiurupan, ulang dong na marsidalian ijin
Tuhanta do na gabe hayu anggur, ranting-Ni do hita on hajojo
Jolom ma Jesus ulang ham pandur, ase tabun marbuah na ramos.

10. Ambilan: 2 Samuel 9:1-8 : Pdt. Dr. Edison Munthe

11. Galangan

P : Paima iondoskon hita galanganta, tangar hita ma lobei hata ni Naibata na gabe onjolan banta laho manggalang, aima na tarsurat bani Heber 13:16: “mambahen na madear ampa na marsibere-bere, ulang ma halupahon nasiam ai, ai galangan na sonai do iharosuhkon Naibata.” **Sonari ondoskon hita ma galanganta!**

Singer: mandodingkon doding rohani: “Galangan”

Syair dan lagu: Pdt. Ito Belihar Purba, S.Th. M.Sn.
Roh hita sonari hulobei ni Tuhanta
Laho manggalang galangan malas uhur
Dear ondoskon ham bani malas ni uhur
Martarima kasih hu lobei-lobei-Ni
Ai pasu-pasu-Ni buei tumang ijalo hita ale
Tong dingat ma hita, ganupan na dong banta
Ronsi goluhta, pasu-pasu-Ni Tuhan
Ai idop ni uhur-Ni do manobus hita
Bai hayu parsilang na gabe galangan
Sai dingat ma hita bani holong-Ni Tuhan in, ale
Parsahap na pantun, in do na gabe galanganta
Parlahou na talup sonai pangabak sipujion
Goluh na ondos, in do galangan na maharga
Dear ma boan hita in bai Tuhan Naibatanta
On ma galangannami....Ondos ma Bamu....
Rap ampakon goluhnam... Ondos ma Bamu

12. Tonggo Galangan/Panutup-Pasu-pasu

P. Riap ma hita jongjong!

Martonggo ma hita mangondoskon galanganta hubani Naibata!
Ham Tuhan Naibata Bapanami, harohan ni haganup, hunBamu do harohan ni pasu-pasu hubannami.
Ibere Ham do bannami goluh ampa hagoluhan ari-ari. Ham Tuhan, ijon iondoskon hanami do huBamu goluh pakon pasu-pasu na dob binere-Mu in bannami. Sai lambin margogoh ma tongon hanami ihasomani idop ni uhur-Mu ampa pasu-pasu-Mu bani na mandalankon horjanami. Papansing Ham ma galangan na ginalangkon namion gabe galangan na misbou i lobei-lobei-Mu, ase lambin ihargahon hanami tongon dear ni layak pakon pasu-pasu-Mu in marhitei na pasaudkon harosuh-Mu humbani gogoh, pingkiran, ampa sinadongan nami. Tarima kasih ma Bamu Tuhan. Marhitei Kristus Jesus, jalo Ham ma galangan pakon tonggonami on. Amen.

P+K.**Mandodingkon** : Halleluya No 340:1 As=do

Huondoskon bani Jesus, haganupan diringku
Ia do pasangaponku, sadokah bai goluhkon
Huondoskon ma, huondoskon ma
Bani Jesus Sipaluah, huondoskon ma.

P. Ham Bapanami na i nagori atas. Sai napapansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlanjouan. Paluah Ham ma hanami humbani pangagou.

K. *Mandodingkon “Ai Ham do Simada Harajaon”*

Ai Ham do simada harajaon pakon hagogohon
ampa hasangapon sadokah ni dokahni, Amen.

Paingkathon (pengutusan)

- P. Laho ma nasiam janah totap ma nasiam, ulang mubah-ubah, anjaha lambin surung ma ibagas horja ni Tuhan in, ai ibotoh nasiam, sedo na soya halojaon nasiam ibagas Tuhan in.
- P. **Jalo ham ma pasu-pasu humbani Tuhan Naibatanta:**
Ipasu-pasu janah iparorot Tuhan Naibata ma ham. Isondangkon Tuhan Naibata ma bohi-Ni hu bamu janah maidop ma uhur-Ni mangidah ham. Idompakkon Tuhan Naibata ma bohi-Ni hu bamu janah ipasorap ma damei-Ni bani tonduyumu. Amen.
- P+K.(mandodingkon: Amen)Amen, amen, amen.

III. ACARA PENUTUP

1. Tingting mewakili 4 JemaatPMJ P.Bulan
2. Sambutan olob-olob:
 - a. Mewakili PHMJ GKPS sa resort Polonia St. Fredy Saragih
 - b. Mewakili Pengurus resort ..Pdt. Jemmi.R Saragih STh
 - c. Ucapan Terimakasih hubani Pengkotbah pkn Full Timer ...St. Drs. Jhan Perkin Purba.